

Na osnovu člana 27. stav 2. i člana 37. Zakona o mikrokreditnim organizacijama ("Službene novine Federacije BiH", broj 59/06), čl. 4., 9. i 25. Zakona o Agenciji za bankarstvo Federacije Bosne i Hercegovine ("Službene novine Federacije BiH", broj 9/96, 27/98, 20/00, 45/00, 58/02, 13/03, 19/03, 47/06 i 59/06) i člana 18. Statuta Agencije za bankarstvo Federacije BiH ("Službene novine Federacije BiH", broj 42/04), Upravni odbor Agencije za bankarstvo Federacije BiH, na sjednici održanoj 14. marta 2007. godine, donosi

ODLUKU

O VISINI I NAČINU FORMIRANJA I ODRŽAVANJU REZERV ZA POKRIĆE KREDITNIH GUBITAKA MIKROKREDITNIH ORGANIZACIJA

Član 1.

Ovom Odlukom se propisuje visina i način formiranja i održavanja rezervi za pokriće kreditnih gubitaka mikrokreditnih organizacija (u daljnjem tekstu: MKO).

Član 2.

Osnovicu za obračun visine rezervi iz člana 1. ove Odluke čini iznos neotplaćenog kredita, dospjele kamate i naknade i sve druge stavke kod kojih je MKO izložena riziku nemogućnosti naplate, odnosno poslovnog neuspjeha.

Član 3.

MKO je dužna da stavke iz člana 2. ove Odluke mjesečno raspoređuje u grupe primjenom kriterijuma dana kašnjenja u otplati i da za svaku grupu izdvoji rezerve za pokriće kreditnih gubitaka na teret troškova i to prema slijedećim grupama i stopama rezervi:

Dani kašnjenja	Stope rezervisanja
1-15 dana	2%
16-30 dana	15%
31-60 dana	50%
61-90 dana	80%
91-180 dana	100%
preko 180 dana	Otpis

Kada dospjele kamate (redovne, zatezne) i naknade nisu naplaćene u roku do 15 dana, MKO je dužna u 100%-nom iznosu tog potraživanja formirati rezerve za pokriće kreditnih gubitaka.

Sva potraživanja koja su dospjela, a nenaplaćena preko 180 dana, MKO je dužna da isknjiži iz bilansa stanja nakon pokretanja sudskog spora i vodi u vanbilansu do naplate potraživanja ili trajnog otpisa (isknjižavanje iz knjiga).

Ponovo ugovoreni kredit predstavlja kredit koji je prolongiran, restrukturiran ili na neki drugi način izmijenjen zbog kašnjenja u otplati i MKO je dužna zadržati ga sa istom stopom rezervisanja najmanje jedan izvještajni period.

MKO je obavezna da uspostavi sistem koji će omogućiti formiranje i održavanje rezervi za pokriće kreditnih gubitaka propisanih ovim članom.

Član 4.

MKO je dužna, u skladu sa odredbama ove Odluke, Agenciji za bankarstvo Federacije BiH (u daljnjem tekstu: FBA) dostavljati kvartalni izvještaj na obrascu kojeg posebnom odlukom propisuje FBA u roku od 30 dana od izvještajnog kvartala.

Izveštaj za zadnji kvartal prethodne godine pripremljen na osnovu preliminarnih podataka, MKO je dužna dostaviti FBA do 31.01. tekuće godine.

Rok za dostavu izvještaja pripremljenih na osnovu konačnih podataka za prethodnu godinu je 05. 3. tekuće godine.

Izveštaj MKO mora biti potpisan od ovlaštenog lica.

Član 5.

Ova Odluka stupa na snagu osmog dana nakon objavljivanja u "Službenim novinama Federacije BiH".

Broj 01-1-393-10/07
14. marta 2007. godine
Sarajevo

Predsjednik Upravnog odbora
mr. **Eldar Arnautović**, s. r.